


Oz ein ils Dis europeics dil patrimoni



SETTEMBER

Ils Dis europeics dil patrimoni


Tgei sezuppa davos las portas e la miraglia d'in casti? Tgi ha construiu la tuor da crap e co vesa ella ora endadens? Con vegls ei il viaduct e pertgei tegn el aunc adina? Castials, tuors, viaducts e punts veglias savessen raquintar a nus bia historias dil vargau – sch'els savessen discuorer ... Dar il plaid a tals monuments, a quels patrimoni dil passau, quei ei l'idea dils Dis europeics dil patrimoni ni per tudestg «Denkmaltage».

Ils Dis europeics dil patrimoni dat ei en 50 tiaras. En Svizra ein els mintgama la secunda fin d'jamna da settember. Duront quels dus dis has ti la schanza da scuvierer ils scazis da pli baul e da vegnir a saver lur historias e misteris.

Impurtonts patrimoni el Grischun ein per exempel las lingias dalla Viafier

retica dall'Alvra e dil Bernina. Quellas lingias da tren muossan numnadamein en tgei moda e maniera geniala ch'ils carstgauns han baghegiu gia avon varga 100 onns, per exempel las punts ed ils viaducts renomai. Per punts, vias e sendas va ei igl onn 2024 als Dis europeics dil patrimoni sut il motto «colligiau». Las colligiazions – seigi quei lingias da tren ni vias – eran impurtontas pil brat da rauba. Persunas da differentes loghens savevan s'entupar grazia allas colligiazions ed aschia ha ei puspei dau novas colligiazions ed or da quei mintgatun era novs monuments e novs misteris ...

Tgei colligiazions e monuments ch'ei dat da scuvierer als Dis europeics dil patrimoni ed il program per affons e carschi anflas ti sin:
● www.kulturerbe-entdecken.ch



Con veglia ei tia casa?

Tgei ei per tei in scazi da pli baul?

In monument sa era esser ina statua d'ina persuna renomada.

Has ti gia viu ina statua? Da tgi?

Per tgei ni per tgi construesses ti ina statua?

Daventa detectiv:a da patrimoniis!

1


Pren in bloc ed in rispli, in telefonin ni in apparat da fotografar, in cumpogn ni ina cumpogna e fai ina spassegiada tras tiu vitg.

Contempla ina ga bein las casas veglias, las punts, las tuors ni ils castials (sch'ei dat tals) ed autras caussas interessantas da pli baul. Tscharna in da quels patrimoniis e malegia ni fotografescha el.

Emprova d'eruir:

- Con vegls ei tiu patrimoni?
- Con impurtonts eis el?
- Per tgi eis el impurtonts?
- Daco dat ei quei patrimoni?
- Tgei valeta haveva el pli baul e tgei valeta ha el oz?
- Eis ei in bi patrimoni?

Va el biro da turissem ni damonda ina persuna da tiu vitg ch'enconuscha fetg bein tut quei da pli baul. Fai ina descripziun cuorta da tiu patrimoni.



Descripziun dil patrimoni

1

Con vegls ei tiu patrimoni? _____

Con impurtonts eis el? _____

Per tgi eis el impurtonts? _____

Daco dat ei quei patrimoni? _____

Tgei valeta haveva el pli baul? _____

E tgei valeta ha el oz? _____

Eis ei in bi patrimoni? _____



Fai in patrimoni per palpar

2

Ti drovas:

- models (mira las proximas paginas)
- pupi pli gries
- in rispli
- cola

Pren in model, per exempel la baselgia. Dessegna ella cun rispli sin il pupi pli gries. Pren ussa la cola e va suenter cun ella las lingias dil rispli. Lai schigliar la cola. Cura che la cola ei schetga, sas ti serrar ils eglis e palpar las lingias da cola cun la detta.

Sche ti fas tut ils patrimoni cun cola (tut ils models), sas ti far in giug ordlunder: lai palpar tiu cumpogn ni tia cumpogna ils maletgs. Anflan els ora tgei patrimoni ch'els palpan?

